

# Za tydzień je bamż Benedikt XVI. w Němskej

## Pokiwy putnikam na Božu mšu ze swjatym wótcem w Erfurće

Zastupne lisćiki za Božu mšu z bamžom Benediktom XVI. w Erfurće su do redakcije Katolskeho Posoła dóšli. Tute rozdžela so putnikam sobotu, 24. septembra, w busu po puču do Erfurta. Wšitcy či, kotřiž so individuelnje na tute kemše podaža a su w redakciji Katolskeho Posoła přizjewjeni, njech na telefonowe čisło (0 35 91) 55 02 10 zazwonja, zo bychu sej dojednali, na kotre wašnje k swojim zastupnym lisćikam přińdu. Bjez nich njepríndže z wěstotnych přičin nchtó na Erfurtske Domowe naměsto. Kóždy měł sej swój personalny wupokaz sobu wzać. W jednotliwych padach móhło ke kontrolam dóńc.

### Zažny wotjězd

Busy wotjědu sobotu, 24. septembra, rano w 2.30 hodž. z parkowanišća při Chróšćanskim sportnišću. Zažny termin dyrbi byc, dokelž maja busy hižo w šesćich durinsku stolicu docpěc. Popłatk za busowu jězbu na wosobu, kotrež su so w redakciji Katolskeho Posoła přizjewili, wučinja 20 eurow. Pjenjezy zběraja so w busu.

W Erfurće ma so zaplanować, zo trjebaja putnicy wot busoweho parkowanišća hač na Domowe naměsto něhdže hodžinu, pisa Erfurtski biskop Joachim Wanke. Zastanišća na Domowym naměsće su zawrjene, tak zo dyrbi kóždy někotre mjeńšiny pěši hić. Zastupny lisćik za Božu mšu plaći na tym dnju z dobom jako jězdženka za měsčanske busy a tramwajki. Na naměsće dóstanje kóždy – nimo wěriwych Erfurtskeho biskopstwa, kotřiž budu we wosebitym wobłuku – městno po tym připokazane, kaž na naměsto dóndže. Skupiny móža hromadu wostać. Při zastupje rozdžela so knižki z kěrlušemi a modlitwami.

### Domowe naměsto

Hižo rano w 7.00 hodž. so Domowe naměsto zawrěje. Tež ze zastupnym lisćikom njeje potom přistup hižo móžny. Wobkedźbować ma so, zo njesmě-



dža so wjetše wačoki hač normalny nachribjetnik z jědzu a napojemi na nje sobu wzać. Kóždy pak měł něšto za swójske zastaranje sobu měc. Městna k sedženju na naměsće njebudu. Kóždy smě sej stóličk, ale bjez lany, sobu wzać.

Boža mša z bamžom započnje so w 9.00 hodž. Swjateho wóta pak wočakuja tam w jeho papamobilu hižo wjele prjedy. Domowe naměsto budže wot 4.00 hodž. přistupne.

Wot 6.00 hodž. so na pódlanskim jewišću program k zahajenju z krótkofilmami, rozmołwami, spěwami a dalšim poskići.

Chorhoje a transparenty njesmědža so na Domowe naměsto sobu brać. Młodžinske banery abo towarstwowe chorhoje maja so w Erfurće přizjewić. Wone pak steja potom na separatnym městnje.

Jeli so dešćuje, poruča so, dešćowu cape, nic pak předešćnik, wužić. Škleńčane a termosowe bleše kaž tež alkohol su na Domowym naměsće zakazane. Wobšěrne informacije su pod internetowej adresu [www.papst-in-Erfurt.de](http://www.papst-in-Erfurt.de) wozjewjene.

### Wrócojězba

Po Božej mši, kotraž budže drje něšto wjace hač dvě hodžiny trać, podadža so putnicy zaso k busam. Po individuelnym wobjedže – durinske pražene kołbaski maja dobre mjeno – podadža so busy zaso na dompuć. Zastaranske wozy změja swoje městno na kromje Domoweho naměsta. Jeli wšo derje wotběži, móhli wšitcy zaso wokoło 18.00 hodž. doma byc. Dokelž so džeń rano jara zahe započnje a dokelž budže tež přebytk w Erfurće skerje napinacy, njeje so ničo přidatne za tutón džeń zaplanowało.

### Wjeselo

Biskop Wanke pisa, zo so na zetkanje ze swjatym wótcem a wšěmi putnikami hižo wjeseli. Zdobom so nadžija, „zo budže wopyt bamža Benedikta XVI. w Němskej za nas wšěch swjedzeń nadžije a wěry“. R. Ledźbor



HDŽEŽ JE BÓH,  
TAM JE PŘICHOD  
BAMŽOWY WOPYT 2011